

Friûl di Jevât

PAR CURE DA LA SOCIETÂT FILOLOGJICHE FURLANE

Vie Ascoli, 1, Guriza - tel./fax 0481533849 - gorizia@filologicafriulana.it - www.filologicafriulana.it

Dai 5 ai 15 di Mai e torne la manifestazion promovude de Societât Filologjiche Furlane

Une Setemane de Culture Furlane che e ten simpri plui adun il Friûl: dai 5 ai 15 di Mai e torne la manifestazion promovude de Societât Filologjiche Furlane. La rassegne, rivade ae IX edizion, e à in program passe 190 iniziativis jenfri concerti, spetacui teatrâi, cunvignis e conferencis, mostris e inmò cetantis iniziativis in presince, ator par dut il Friûl, e a distance, cun events in streaming dal portâl www.setemane.it. Simpri dal portâl si podarà sedi viodi che discjamâ dut il program de Setemane.

Une vore e di alt contignût a son lis iniziativis che a rivuardin il Friûl di Jevât. Ai 5 di Mai, aes 9 di sere, dal portâl da Setemane al vignarà metût in onde il docufilm *Incanto* di Marco D'Agostini: un viaç ae scuvierde de opare di pre Gilberto Pressacco e des sôs interpretazions dai mosaics de Basiliche di Aquilee.

Simpri dal www.setemane.it, vinars ai 6 e sabide ai 7 di Mai, a misdi e mieç, apontament par cognossi la cusine di vilis e di palaçs dal Friûl di Jevât: vinars ai 6 si podarà scuvierzi Vile del Torre a Romans e sabide ai 7 Vile Pace a Tapoian. Lis cusinis des stessis vilis a saran protagonistis la setemane dopo cu la preparazion di dolç gjavâts fûr dai ricetaris storicis di chês cjasis: vinars ai 13 cu la Gubana gurizana e sabide ai 14 cui biscots Zaletti. Sabide ai 7 a Cormòns a misdi si varà la presentazion dal libri fotografic di Gian Piero Deotto che al complete la mostre "Brda Collio Cuel" te sale civiche dal Comun cun ingrés di via Imbriani o di via Matteotti. La presentazion dal libri, par cure di Giancarlo Torresani, si davuelzarà inte ocasion di "Biblioteca in



(FOTO ENZO ANDRIAN)

Setemane de Culture Furlane

*Une vore e di alt contignût a son lis iniziativis
che a rivuardin il Friûl di Jevât*

Festa" promovude de Biblioteche Comunâl. No si davuelzarà tal Gurizan ma e fevelarà di Gurizan, la cunvigne Scuole di confine a Tarvis. La zornade di studis, inmaneade cul Istitut di Storia Sociâl e Religjiosa di Guriza, a permetarà di scuvierzi la evoluzion dal rapuart jenfri la scuela da nestra region, lis lenghis dal teritori dilunc dal Nûfcent. Cetantis propuestis ançe par domenie ai 8. A Breçan di Cormòns, da lis trê a lis siet daspò misdi si tignarà la decime edizion di Campanili aperti inmaneade da Associazione dai Scampanotadôrs dal Gurizan: si podarà visitâ e lâ sù pai tors de glesie parochiâl di San Lurinz e de

glesie di San Zorç su la mont parsore dal país. Simpri domenie ai 8, da lis cuatri dal dopomisdì, si podarà visitâ la storiche cjalderie a vapôr de amiderie Chiozza a Parteuilis di Ruda. E par finî la zornade, a lis nûf di sere, di www.setemane.it si podarà viodi il documentari Langobardi - Alboino e Romans di Simone Vrech, realizât da la associazion Invicti Lupi che al è daûr a vè une schirie di ricognossiments, su la storie di chel popul e di cuant che al è rivât chi di nô. Simpri sul cjanâl internet da la Setemane, lunis ai 9 aes vot sot sere, si podarà viodi on line il documentari su la fiesta dal "Maj" di

Museu Paleocristian di Munistîr di Aquilea si varà la visite par cognossi la Catidre di Nevo e lis iscrizions paleocristianis, inmaneade in colaborazion cul Grop Archeologic Aquileiês. Sabide ai 14 e domenie ai 15, il CTA di Guriza al proponarà cjaminadis ae scuvierde de Guriza scuindude. Simpri domenie ai 15, la setemane si sierarà cun doi events on line simpri dal sît da la Setemane: a lis sîs sot sere, la presentazion dal volum publicât pal centenari dal Còr Polifonic di Ruda e aes nûf la proiezion dal docufilm *Atlante della Memoria* dedeât a Ugo Pellis e ae imprese dal Atlant Linguistic Talian.

■ Daspò des limitazions de emergjence sanitarie tes edizions dal 2020 e dal 2021, si tome in presince

196 events in presince e a distance

La Setemane de culture furlane di chest an e torne cun passe 196 events in presince e a distance.

Biadelore, in cheste edizion de Setemane, daspò des limitazions de emergjence sanitarie tes edizions dal 2020 e dal 2021, si tome in presince cun cetancj events par dut il Friûl. Come simpri, tantis e diversis a son lis propuestis culturâls de Setemane. Si ricuardaran grancj dal Friûl tai inovâi di nassite e de muart: il poete Ermes di Colorêt, i scritôrs Riedo Puppo e Elio Bartolini, il studiôs Giuseppe Francescato, il gjornalist Renzo Valente e il composîtôr Luigi

Garzoni di Adorgnan. Cjapitul in bande al merete naturalmentri il Centenari de nassite di Pier Paolo Pasolini che al vignarà ricuardât in diversis events e cu la mostre Pasolini 100. Mario Micossi sui luoghi delle "Poesie a Casarsa" rincurade di Gianfranco Ellero e che si podarà visitâ fin ai 12 di Jugn inte sale espositive de Cjanive de Filologjiche di Palaç Mantica di Vie Manin 18 a Udin. Cun di plui, dal sît internet de manifestazion ae direzion www.setemane.it, no dome si podarà viodi e discjamâ dut il program de rassegne, ma viodi ançe cetancj dai events in program in streaming. In grazie dal sucès di cheste oportunitât

metude a disposizion tai agns passâts e al jutori di Ente Friuli nel Mondo ançe lis comunitâts dai fogolârs furlans tal forest a podaran viodi cetancj events de setemane on line.

Tra i events de Setemane on line o ricuardin in particolar la metude in onde di diversis docufilms realizâts tai ultins agns: tra chescj, sabide ai 7 di Mai, Nel paese di temporali e primule di Andrea D'Ambrosio, un viaç tai lûcs de infanzie e de zoventût di Pier Paolo Pasolini: Cjasarsa, Versuta e il Friûl di Soreli a mont; lunis ai 9 di Mai, Patriae di Marco D'Agostini, par cognossi events de storie dal Patriarcjât di Aquilee traviers i

voi di une zovine. Simpri par insiorâ la propueste culturâl on line de Setemane a saran metudis in linie diversis rubricis su argomenti specifics, ducj realizâts inte suaze di projets inmaneâts de Filologjiche: la presentazion dai periodics che a fasin part dal portâl des rivistis furlanis (ogni di aes 15); par cognossi episodis de prime Vuere in Friûl e tal Gurizan, aes 15.30, a saran trasmetûts 5 videodocumentaris dai 9 ai 13 di Mai. Ancjemò, aes vot di sere, la proiezion dai documentaris etnografics realizâts da Olivia Averso Pellis e Andreina Ciceri jenfri il 1972 e il 1975 su diversis aspiets des tradizions populârs



furlanis. Come tradizion la Setemane de culture si sierarà domenie ai 15 di Mai cu la Fraie de Vierte de Filologjiche, che si le fararà a Cjassâ.